

四庫全書

集部

欽定四庫全書

集部  
鴻李詩繫卷一

詳校官侍講臣王燕緒

主事銜臣徐以坤覆勘

總校官進士臣朱鈴

校對官編修臣繆晉

謄錄監生臣繆汝芬

欽定四庫全書

集部八

檇李詩繫

總集類

提要

臣等謹案檇李詩繫四十二卷

國朝沈季友撰李友有學古堂詩集已著錄是編輯嘉興一郡之詩自漢晉以迄

本朝凡縉紳韋布閨秀方外土著流寓有吟咏傳世者皆錄之而以仙鬼題咏謠謡附焉姓

氏之下又各為小傳畧叙梗概其山川古蹟  
土風物產亦間加附注以備考据初明景泰  
中嘉興朱翰嘗詮次洪永以來郡人之詩為  
檇李英華一書所收不盡雅馴崇禎末秀水  
蔣之翹復續為檇李詩乘其卷帙之富什倍  
英華而遺稿散佚遂無傳本季友此書踵二  
家之後而更加詳博殘章賸句蒐訪靡遺擣  
撫之勤殊為不苟其間若趙孟堅小傳沿山

房隨筆之誤以為卒於元時吳鎮沒於至正  
間與楊璉真伽時代迥不相及而謂楊發諸  
墳不及鎮墓此類皆為疎於考核然其甄綜  
頗備一鄉文獻亦藉以有所徵焉乾隆四十  
六年五月恭校上

總纂官臣紀昀臣陸錫熊臣孫士毅

總校官臣陸費墀



欽定四庫全書

稿李詩繫卷一

平湖沈季友編

漢

嚴夫子忌

忌本莊姓避明帝諱稱嚴由奉人忌與司馬相如俱好辭賦哀屈原受性忠貞不遇明主而遭暗世乃斐然作辭歎而述之曰哀時命遭景帝不好辭

賦無所得志聞梁孝王右文通賓客乃徒步入梁  
受知孝王與鄒陽枚乘俱見尊重而忌名尤甚世  
稱嚴夫子自吳越不列於風而秦漢以前我郡之  
詩無所考見故斷自忌始讀其儼騷一篇纏綿怨  
思不失其正足開七邑詞源取而錄之其猶三閭  
之遺意乎

哀時命

哀時命之不及古人兮夫何予生之不遘時往者不可

扳援兮狹者不可與期志憾恨而不逞兮抒中情而厲  
詩夜炯炯而不寐兮懷隱憂而厯茲心鬱鬱而無告兮  
衆孰可與深謀欲愁悴而委情兮老冉冉而逮之居處  
愁以隱約兮志沈抑而不揚道壅塞而不通兮江河廣  
而無梁願至崑崙之懸圃兮采鍾山之玉英攀瑤木之  
樟枝兮望閬風之板桐弱水汨其為難兮路中斷而不  
通勢不能凌波以徑度兮又無羽翼而高翔然隱憫而  
不達兮獨徙倚而彷徉悵惝罔以永思兮心紆軫而增

傷倚躋躇以淹留兮日飢饉而絕糧廓抱景而獨倚兮  
超永思乎故鄉廓落寂而無友兮誰可與玩此遺芳白  
日晚晚其將入兮哀余壽之弗將車既敝而馬疲兮蹇  
遭迴而不能行身既不容於濁世兮不知進退之宜當  
冠雀嵬而切雲兮劍淋漓而縱橫衣搘葉以儲與兮左  
祛挂於搏桑右衽拂於不周兮六合不足以肆行上同  
鑿枘於伏戲兮下合矩矱於虞唐願尊節而式高兮志  
猶卑夫禹湯雖知因其不改操兮終不以邪枉而言方

世竝舉而好朋兮壹斗斛而相量衆比周以肩迫兮賢者遠而隱藏為鳳凰作鶴籠兮雖翕翅其不容靈皇其不寤知兮焉陳詞而効忠俗嫉妬而蔽賢兮孰知予之從容願舒志而抽馮兮庸詎知其吉凶璋珪雜乎飢窒兮龍廉與孟陬同宮舉世以為恒俗兮固將愁苦而終窮幽獨轉而不寐兮惟煩邇而盈匈魂渺渺而馳騁兮心煩寃之懾懾志歛憾而不憺兮路幽昧而甚難塊獨守此曲隅兮然欲切而永歎愁修夜而宛轉兮氣涫瀼

其若波搘削劙而不用兮操規榦而無所施騁騏驥於  
中庭兮焉能極夫遠道置猿狖於櫺檻兮夫何以責其  
捷巧駟跛鼈而上山兮吾固知其不能陞釋管晏而任  
減獲兮何權衡之能稱寃落雜於廢蒸兮櫟蓬矢以狀  
革負擔荷以丈尺兮欲伸要而不可得外迫脅於櫟臂  
兮上牽聯於矰雉肩傾側而不容兮固匪腹而不得息  
務光自投於深淵兮不獲世之塵垢孰魁摧之可久兮  
顧退身而窮處鑿山楹而為室兮下披衣於水渚霧露

濛濛其晨降兮雲依斐而承宇虹霓紛其朝霞兮夕淫  
淫而淋雨怊茫茫而無歸兮悵遠望北曠野下垂釣於  
谿谷兮上要求於仙者與赤松而結友兮比王喬而為  
耦使梟楊光導兮白虎為之前後浮雲霧而入冥兮騎  
白鹿而客與魂耻以寄獨兮汨徂往而不歸處卓卓  
而日遠兮志浩蕩而傷懷鸞鳳翔于蒼雲兮故矰繳而  
不能加蛟龍潛於旋淵兮身不挂於網羅知貪餌而近  
死兮不下遊乎清波寧幽隱以遠禍兮孰侵辱之可

為子胥死而成義兮屈原沈於汨羅雖體解其不變兮  
豈忠信之可化志怦怦而內直兮履繩墨而不頗執權  
衡而無私兮稱輕重而不差慨塵垢之狂攘兮除穢累  
而反真形體白而質素兮中皎潔而淑清時厭飲而不  
用兮且隱伏而遠身聊竄端而匿迹兮嘆寂默而無聲  
獨使悄而煩毒兮焉發憤而紓情時曖曖其將罷兮遂  
悶歎而無名伯夷死於首陽兮卒天隱而不榮太公不  
遇文王兮身至死而不得逞懷瑤象而佩璲兮顧陳列

而無正生天墜之若過兮忽爛漫而無成邪氣襲余之  
形體兮疾惛怛而萌生願一見陽春之白日兮恐不終

辛永年

晉

干散騎寶

寶字令升父瑩自新蔡隨晉南渡徙居海鹽少勤  
學博覽以才器名為著作郎平杜琰有功賜爵關  
內侯中興草創未置史官中書監王導以寶請於

是領國史著晉紀自宣帝迄愍帝五十三年凡二十卷直而能婉稱良史焉歷散騎常侍性好陰陽術數留思京房夏侯勝等傳寶父有寵婢母甚妒及父亡母乃生推婢於墓中後十餘年母喪開墓婢伏棺如生經日而蘇言其父常取飲食與之地中亦不覺為惡寶遂悟天地間鬼神事乃起撰集古今神祇靈異人物變化之事為搜神記以示劉惔惔曰卿可謂鬼之董狐鶴林玉露載楊誠齋與同舍談及于寶一吏進

曰乃干寶非于也因取韻書干字注云晉有干寶誠齋大喜曰汝乃吾一字之師今海鹽圖經亦從之

從軍行

壯士稟桀姿氣烈有自然俯仰羣雄中何能救世艱闕  
翠代縫掖兜鍪易進賢

無名氏

晉樂苑曰嘉興人養鴨兒鴨兒既死因有此歌

阿子歌三首

阿子復阿子念汝好顏容風流世希有窈窕無人雙  
春月故鴨曉獨雄顛倒落工知悅弦死故來相尋博  
野田草欲盡東流水又暴念我雙飛鳬饑渴常不飽

陳

顧黃門野王

野王字希馮海鹽人七歲讀五經知大旨九歲制  
目賦十二歲隨父入建安撰建安地紀及長編觀  
經史精記默識天文地理著龜占候蟲篆奇字無

所不通仕梁為博士中領軍嘗與瑯琊王褒為宣  
城王客野王善丹青王於東府起齋令野王畫古  
賢命褒書贊時稱二絕侯景之亂募兵援京杖戈  
被甲抗辭作色見者莫不壯之太尉王僧辨深嘉  
其義使監本縣事陳天嘉中補撰史學士大建中  
領大著作兼通事舍人與江總陸瓊諸人並以才  
學推重遷黃門侍郎卒贈祕書監右衛將軍總哭  
以詩云獨酌一樽酒高詠七哀詩何言萬里別非

復竹林期墮荒鄭公草戶閒董生幃人隨暮槿落  
客共晚鶯悲年髮兩如此傷心獨幾時所撰玉篇  
輿地志符瑞圖顧氏譜傳分野樞要續洞冥記玄

象表文集行世

陽春歌

春草正芳菲重樓啓曙扉銀鞍俠客至柘彈宛童歸池  
前竹葉滿井上桃花飛薊門寒未歇為斷流黃機

隴頭水

隴底望秦川迢遙隔風烟蕭條落野樹幽咽響流泉瀚  
海波難息交河冰未堅安知蓋山水逐節赴危絃

羅敷行

東隅麗春日南陌采桑時樓中結梳罷提筐候早期風  
輕鶯韻緩露重落花遲五馬光長陌千騎絡青絲使君  
徒遣信賤妾畏蠶飢

豔歌行

燕姬妍趙女麗出入王宮公主第倚鳴瑟歌未央調絃

八九弄度曲兩三章唯欣春日永詎愁秋夜長歌未央  
倚鳴瑟輕風飄落葉乳燕巢蘭室結羅帷翫朝日窗開  
翠幔卷妝罷金星出爭攀四照花競戲三條術

唐

丘庶子為

為嘉興人事繼母孝有芝生堂下光啓間累官太  
子右庶子年八十餘還鄉詔給俸祿之半縣令謁  
之為候門磬折令坐乃拜里胥立庭下既出乃敢

坐經縣署降馬而趨有集六卷王維有送丘為往  
唐州詩云宛洛有風塵君行多苦辛四愁連漢水  
百口寄隨人槐色陰清晝楊花惹暮春朝端肯相  
送天子繡衣臣摩詰又送丘為下第詩云憐君不  
得意况復柳條春為客黃金盡還家白髮新五湖  
三畝宅萬里一歸人知爾不能薦羞稱獻納臣劉  
長卿送丘為赴上都詩云帝鄉何處是歧路空垂  
泣楚思愁莫多川程帶潮急潮歸人不歸獨向回

塘立

湖中寄王侍御

日日湖水上好登湖上樓終年不向郭過午始梳頭嘗  
自愛杯酒得無相獻酬小僮能膾鯉少妾事蓮舟每有  
南浦信仍期後月遊方春轉搖蕩孤興時淹留驄馬真  
傲吏翛然無所求晨趨玉階下心許滄江流少別如昨日  
何言經數秋應知方外事獨往非悠悠

尋西山隱者不遇

絕頂一茅茨直下三十里叩闕無僮僕窺室唯案几若  
非巾柴車應是釣秋水差池不相見鼴勉空仰止草色  
新雨中松聲晚窗裏及茲契幽絕自足蕩心耳雖無賓  
主意頗得清淨理興盡方下山何必待之子

泛若耶谿

結廬若耶裏左右若耶水無日不釣魚有時向城市谿  
中水流急渡口水流寬每得樵風便往來殊不難一川  
草長綠四時那得辨短褐衣妻兒餘糧及雞犬日暮鳥

雀稀稚子呼牛歸住處無鄰里柴門獨掩扉

題田家廬舍

春風何時至已綠湖上山湖上春既早田家日不閒溝  
塍流水處未耜平蕪間薄暮飯牛罷歸來還閉關

尋廬山崔徵君

日高雞犬靜門掩向寒塘夜竹深茅宇秋亭冷石牀住  
山年已遠服藥壽偏長虛棄浮生者相逢益自傷

登潤州城

天末江城曉登臨客望迷春潮平島嶼殘雨隔虹蜺鳥  
與孤帆遠烟和獨樹低鄉山何處是目斷廣陵西

竹下殘雪

一點消未盡孤明在竹陰晴光夜轉瑩寒氣曉仍深還  
對讀書牖且闌乘興心已能依此地終不傍瑤琴

送閻校書之越

南入剡中路暮雲應轉微湖邊好花照山口細泉飛此  
地饒古跡世人多忘歸經年松雪在永日世情稀芸閣

應相望芳時不可違

左掖梨花

冷艷全欺雪餘香乍入衣春風且莫定吹向玉階飛

陸尉士修

士修字里未詳大厯間為嘉興尉與顏真卿善顏  
守湖州士修往來禾雪間多聯句詩峴山窪樽之

咏士修亦與焉

三言擬五雜組與李萼殷佐明顧真卿袁高蔣

志同作

五雜組闌闊間往復還門上關不得已鬢毛斑

三言喜皇甫曾侍御見過南樓翫月同顏真卿

陸羽皇甫曾李萼皎然作

露欲晞客將醉猶宛轉照深意

月夜啜茶聯句

泛花邀坐客代飲引情言

士修

醒酒宜華席留僧想獨園

張萬不須攀月桂何假樹庭萱

李萼

御史秋風勁尚書北斗

尊崔流華淨肌骨疏淪滌心原

顏真卿

不似春醪醉何辭

綠水繁皎然

皎然

素瓷傳靜夜芳氣滿閒軒

高來

夜宴詠燈聯句

桂酒韋詩興蘭缸照客情

士修

詎慙珠乘朗不讓月輪明

張破暗光初白浮雲色轉清

顏真卿

帶花疑在樹比燎欲

分庭皎然

皎然

顧已慙微照開簾識近汀

袁高

華陽真逸顧況

況字逋翁海鹽人至德二年進士志尚踈逸頗好

詼諧雖王公之貴必戲侮之與柳渾李泌為方外  
友渾輔政以祕書郎召況況答詩云四海如今已  
太平相公何用喚狂生此生還似籠中鶴東向滄  
溟呌數聲及泌相自謂當得達官久之稍遷著作  
郎白居易初舉以詩謁況況謔之曰長安百物貴  
居大不易及讀至原上草詩野火燒不盡春風吹  
又生嘆曰有句如此居亦何難老夫前言戲之耳  
因為延譽鄭侯卒况感其知作海鷗詠云萬里飛

來為客鳥曾逢丹鳳借枝柯一朝鳳去梧桐死滿  
目鵠梟奈爾何為權貴所嫉坐詩語調謔貶饒州  
司戶參軍況文詞之外兼工小筆嘗求知新亭鹽  
監人或詰之況曰余要貌海中山耳半年解綬去  
家縣南橫山宅邊有禪寂寺故有家在雙峰蘭若  
邊之句後結廬茅山號華陽真逸年九十卒人謂  
尸解去況嘗與三詩友遊苑中坐流水上得大梧  
葉上有詩云一入深宮裏年年不見春聊題一片

葉寄與有情人況亦題一葉放於波中詩曰花落  
深宮鶯亦悲上陽宮女斷腸時君恩不禁東流水  
葉上題詩欲寄誰後十餘日有人於苑中尋春又  
於葉上得詩以示況詩曰一葉題詩出禁城誰人  
倚和獨含情自嗟不及波中葉蕩漾乘春取次行  
有集二十卷皇甫湜為序云偏於逸歌長句駿發  
踔厲往往若穿天心出月脇意外驚人語非尋常  
所能及最為快也又曰自吾為顧況集序未嘗許

人也其為名流嘆重如此

華山西岡遊贈隱玄叟

羣峰鬱初霽澑黛若鬟沐天風鼓哈呀搖撼千灌木  
葉微墮黃石泉淨停渌危磴蘿薜牽迴步入幽谷我心  
寄青霞世事慙蒼鹿遂令巢許輩于焉謝塵俗想是悠  
悠雲可契去留躅

行路難三首

君不見擔雪塞井徒用力炊沙作飯豈堪喫一生肝膽

向人盡相識不如不相識冬青樹上挂凌霄歲晏花凋  
樹不凋凡物各自有根本種木終不生豆苗行路難行  
路難不知何處是平道中心無事當富貴今日覺君顏  
色好

君不見少年頭上如雲髮少壯如雲老如雪豈知灌頂  
有醍醐能使清涼頭不熱呂梁之水挂飛流龜鼈蜃  
不敢遊少年恃險若平地獨倚長劍凌清秋行路難行  
路難昔日少年今已老炫目春光不長好前朝竹帛事

皆空日莫牛羊古城草

君不見古人燒水銀變作北邙山上塵  
萬絲挂虛空中欲落不落愁殺人睢水英雄多血刃  
建章宮闕成焜煌淮王身死桂樹折徐福一去音書絕  
行路難行路難生死由命皆由天秦皇漢武遭下脫汝獨何人學神仙

險竿歌

宛陵女兒擘飛手長竿橫空上下走已能輕險若平地  
豈肯身為一家婦宛陵將士天下雄一下定却長梢弓

翻身挂影恣騰躍反綰頭髻盤旋風飛鳥驚猿遶樹枝  
裏頭打鼓不聞時手蹉脚跌蜘蛛絲忽雷掣斷流星尾  
曜暎剗破蚩尤旗若不隨仙作仙女即應嫁賊生賊兒  
中丞方畧通變化外戶不扃從女嫁

稽山道芬上人畫山水歌

鏡中真僧白道芬不服朱審李將軍墨汁平鋪洞庭水  
筆頭點出蒼梧雲且看八月十五夜月下看山盡如畫

李湖州孺人彈箏歌

武帝昇天留法曲淒清掩抑絃柱促上陽宮人怨青苔  
此夜想夫憐碧玉思婦高樓刺壁窺愁猿叫月鸚呼兒  
寸心十指有長短妙入神處無人知獨把梁州凡樂拍  
風沙對面胡秦隔聽中忘却前溪碧醉後猶疑邊草白  
蕭子草書人不及洞庭葉落秋風急上林花開春露溼  
花枝濛濛向水泣見君數行之灑落石上之松松下鶴  
若把君書比仲將不知誰在凌雲閣

蕭鄭草書歌

露青竹鞭歌

鮮于仲通正當年  
章仇兼瓊在蜀川  
約束蜀兒採馬鞭  
蜀兒採鞭不敢眠  
橫截斜飛鳥邊繩  
橋夜上層崖巔  
頭插白雲捧飛泉  
採得馬鞭長且堅  
浮沤丁子珠聯聯  
灰煑蠟揩光爛然  
章仇兼瓊持上天  
上天雨露何其偏  
飛龍閑廄馬數千  
朝飲吳江夕秣燕  
紅塵撲轡汗溼羈  
獅子麒麟聊比肩  
江面昆明洗刷牽  
四蹄踏浪頭擣天  
蛟龍稽額河伯虔  
拓羯胡離脚手鮮  
陳閑韓幹丹青妍

欲貌未貌眼欲穿金鞍玉勒錦連乾騎入桃花楊柳烟  
十二樓中奏管絃樓中美人奪神仙爭愛大家把此鞭  
祿山入闕關破年忽見揚州北印前祇有人還千一錢  
亭亭筆直無皺節磨將形相一條鐵市頭格是無人別  
江海賤臣不拘絀垂窗挂影西窗缺稚子覓衣挑仰穴  
家童拾薪幾拗折玉潤猶沾玉壘雪碧鮮似染長弘血  
蜀帝城邊子規咽相如橋上文君絕往年策馬降至尊  
七盤九折橫劒門穆王八駿超崑崙安用冉冉孤山根

聖人不貴難得貨金玉珊瑚誰買恩

公子行

輕薄光面如玉紫陌春風纏馬足雙鞶縣金鎖鶻飛長  
衫刺雪生犀束綠槐夾道陰初成珊瑚幾節敵流星紅  
肌拂拂酒光凝當街背拉金吾行朝遊鼙鼙鼓聲發莫  
遊鼙鼙鼓聲絕入門不肯自升堂美人扶踏金階月

八月五日歌

四月八日明星出摩耶夫人降前佛八月五日佳氣新

昭成太后生聖人開元九年燕公說奉詔聽置千秋節  
丹青廟裏貯姚宋花萼樓中宴歧薛清樂靈香幾處聞  
鸞歌鳳吹動祥雲已於武庫見靈鳥仍向普山逢老君  
率上普天無不樂河清海晏窮寥廓梨園子弟傳法曲  
張果先生進仙藥玉座清涼遊帝京悲翁回首望承明  
雲韶九奏杳然遠唯有五陵松柏聳

瑤草春

并序

隴西李迅者納別宅監奴出迅不喜欲訪故人為

刺史強而配焉既歸而不合監奴投井而死因作

瑤草歌以悲之

瑤草春杳容與江南艷歌京西舞執心輕子都信節冠  
秋胡議以腰支嫁時論自有夫蟬鬢蛾眉明井底燕裾  
趙袂縈轆轤李生聞之淚如綆不忍回頭看此井月中  
桂樹落一枝地上鶼鶼唳孤影露桃穰李自成谿流水  
終天不向西翠帳綠窗寒寂寂錦茵羅薦夜淒淒瑤草  
春丹井遠別後相思意深淺

東湖望山歌

浴鮮積翠棲靈異石洞花宮橫半空夜光潭上明星啟  
風雨壇前樹如洗水淹徐孺宅恒乾繩墜洪崖井無底  
主人載酒東湖陰遙望西山三四岑

洛陽早春

何地避春愁終年憶舊遊一家千里外百舌五更頭客  
一路偏逢雨鄉山不入樓故園桃李月伊水向東流

鄱陽大雲寺一公房

盡日陪遊處斜陽竹院清定中觀有漏言外證無生色  
界聊傳法空門不用情欲知相去近鐘鼓兩聞聲

經廢寺

不知何世界有處似前朝石路無人埽松門被火燒斷  
幡猶挂刹故板尚揩橋數卷殘經在多年字欲銷

南歸

老病力難任猶多鏡雪侵鱸魚銷宦况鷗鳥識歸心急  
雨江帆重殘更驛樹深鄉闕殊可望漸漸入吳音

白蘋洲送客

莫信梅花發由來謾報春不才充野客扶病送朝臣  
闕下搖清珮洲邊采白蘋臨流不痛飲鷗鳥也欺人

春鳥詞送元秀才入京

春來繡羽齊暮向竹林棲禁苑銜花出河橋隔樹啼尋  
聲知去遠顧影念飛低別有無巢燕猶窺幕上泥

送大理張卿

秋色依依傷解攜月卿今夜泊隋堤白沙洲上江離長

綠樹邨邊謝豹唬遷客此來無倚仗故人相去隔雲泥  
越禽惟有南枝分目送孤鴻飛向西

送從兄奉使新羅

六氣銅渾轉三光玉律調河宮清奉賚海岳晏來朝地  
接提封入天平賜貢饒揚威輕破虜柔服耻征遼曙色  
黃金闕寒聲白鷺潮樓船非習戰驄馬是嘉招帝女飛  
銜石鮫人賣淚綃管寧雖不偶徐福倘相邀獨島縣空  
翠孤霞上汎寥蟾蜍同漢月蠛𧆉異秦橋水豹橫吹浪

花鷹迴拂霄晨裝凌渺漭夜泊記招搖幾路通圓嶠何  
山是沃焦颶風晴自起陰火暝潛燒鬚髮成新髻人參  
長舊齒扶桑迎日近析木帶津遙夢向愁中積魂當別  
處銷臨川思結網見彈欲求鴟共散羲和歷誰差甲子  
朝滄波仗忠信譯語辨謳謠疊鼓鯨鱗隱陰帆鷁首飄  
南溟垂大翼西海飲文鯢指景尋靈草排雲聽洞簫封  
侯萬里外未肯後班超

寄江南鶴林寺石冰上人

山川重復重心地  
閭相逢忽憶秋  
江月如聞古寺鐘  
湖平南北岸雲抱  
兩三峰定力超香象  
真言攝毒龍風中  
何處鶴石下幾年  
松為報烟霞道人間  
共不容

宿山中僧

不爇香爐烟蒲團坐如鐵  
嘗想同夜禪風墮松頂雪

溪上

采蓮溪上女舟小怯搖風驚起鴛  
央宿水雲撩亂紅

寄淮上柳十三

草蕭中關戶相映綠淮流莫訝春潮潤鷗邊可泊舟

憶鄱陽舊遊

悠悠南國思夜向江南陌楚客斷腸時月明松子落

山中夜宿

涼月挂層峰蘿林落葉重掩關深畏虎風起撼長松

歸山作

心事數莖白髮生涯一片青山空林有雪相待古道無人獨還

過山農家

板橋人渡泉聲茅屋日午雞鳴莫嗔焙茶烟暗却喜曬

穀天晴

宿昭應

武帝祈靈太乙壇新豐樹裏遶千官那知今夜長生殿  
獨閉山門月影寒

橫山故居

家在雙峰蘭若邊一聲清磬發孤烟山連極浦鳥飛盡

月上青林人未眠

題葉道士山房

水邊垂柳赤闌橋洞裏仙人碧玉簫近得麻姑書信否  
潯陽江上不通潮

宮詞二首

玉樓天半起笙歌風送宮嬪笑語和月殿影開聞夜漏  
水晶簾捲近秋河

九重天樂降神仙步舞分行踏錦筵嘈囁一聲鐘鼓歇

萬人樓下拾金錢

桃花曲

魏帝宮人舞鳳樓  
隋家天子泛龍舟  
君王夜醉春眠晏  
不覺桃花逐水流

山僧蘭若

絕頂茅庵老此生  
寒雲孤木伴經行  
世人那得知幽徑  
遙向青峰禮磬聲

越中席上看弄老人

不到山陰二十春  
鏡中相見白頭新  
此生不復為年少  
今日從他弄老人

早春思歸有唱竹枝歌者坐中下淚

渺渺春生楚水波  
楚人齊唱竹枝歌  
與君皆是思歸客  
拭淚看花奈老何

湖中

青草湖邊日色低  
黃茅嶂裏鷓鴣啼  
丈夫飄蕩今如此  
一曲長歌楚水西

山中

野人愛向山中宿  
况在葛洪丹井西  
庭前有箇長松樹  
夜半子規來上啼

江邨亂後

江邨日暮尋遺老  
江水東流橫浩浩  
竹裏閒憩不見人  
門前舊路生青草

丘員外丹

丹嘉興人郡邑志俱失載官諸暨令歷員外郎隱

居臨平山興韋應物鮑防呂渭諸牧守往還唱和  
錢起李端亦多贈言丹有詩七首并聯句諸作及  
江南長安十二月景詞行世崔峒送丘二十二詩  
云積水與寒烟嘉禾路幾千孤猿啼海島窮雁起  
湖田曾見長洲苑嘗聞大雅篇却將封事去知爾  
愛閒眠

題湛長史舊居

身退謝名累道存嘉止足設醴降華旛挂冠守空谷偶

尋野外寺仰慕賢者躅不見昔簪裾猶有舊松竹烟霞  
雖異世風韻如在矚余即江海人歸轍青山曲

奉酬常使君送歸山之作

側聞郡守至偶乘黃犧出不別桃源人一見經累日蟬  
鳴念秋稼蘭酌動離愁臨水降麾幢野艇纔容膝參差  
碧山路目送江帆疾涉海得驪珠棲梧慙鳳質愧非鄭  
公里歸掃蒙籠室

酬重送歸山

楊子詩集

賣藥有時至自知來往疎邊辭池上酌新得山中書步  
出芙蓉府歸乘駁鯨車猥蒙招隱作豈愧班生廬

和韋使君秋夜見寄

露滴梧葉鳴風秋桂花發中有學仙人吹簫弄山月

中元日鮑端公宅遇吳天師聯句

道流為柱史教戒下真仙

嚴維

契中元會初修內景篇

鮑遊方依地僻卜室喜牆連

謝良輔

寶笥開金籙華池漱

玉泉賈弇惟龍隨羽翼青節降雲烟李清肯去遺丹竈今來

變海田

劉蕃

養形奔二景鍊骨度千年

謝良弼

騎竹投陂裏

攜壺挂牖邊

鄭榮

洞中嘗入靜河上舊談玄

陳元初

伊洛笙

歌遠蓬壺日月偏

樊珣

青驃薦訓引白犬伯陽牽

丘丹

法受

相君後心存象帝先謂道成能縮地功滿欲昇天

范淹

何

意迷孤性含情戀數賢

吳筠

酒語聯句

山簡酣歌倒接離

劉蕃

看朱成碧無所知

鮑防

耳鳴目眩駟

馬馳

謝良輔

口稱童羖腹鳴夷

謝良弼

兀然落帽灌酒卮

沈仲

昌太常吏部相對時嚴維籍糟枕麴浮酒池丘甕間離下

臥不移

呂渭

吁呼不應無事悲

鄭渠

千日一醒知是誰

陳元初

左傾右倒人避之迴

陸宣公贊

贊字敬輿居郡城甜瓜巷年十八第進士中博學宏辭歷監察御史翰林學士德宗奇其才嘗以行輩呼而不名從狩奉天益見親倚恒居中參裁可否時號內相帝偶與相失夜召不得詔得贊者賞

千金及來謁太子以下皆稱賀時機務填委書詔  
日數百他學士筆閣不得下贊沛然有餘皆周盡  
事情人人可曉常勸帝痛自咎悔以謝天下詔下  
雖武夫悍卒無不感泣遭諫議大夫仍為學士天  
下望以為相權貴沮之又言事無諱失帝意為中  
書舍人久之除權知兵部侍郎仍為學士寶參讒  
阻之罷學士參知始同中書門下平章事贊諫諍  
愈切或規其太過贊曰我上不負天子下不負所

學遑恤其他帝滋不悅以諫用裴廷齡罷為太子賓客廷齡日讒之賴陽城等論辨貶忠州別駕杜門集方書人罕見其面順帝立召還詔未至卒贈兵部尚書謚宣奏議數百篇譏陳時弊皆本仁義後蘇軾劄子稱其有王佐才賢于子房賈誼而德宗始親終疎放逐以死古今痛之錢起有送贊擢第還詩云鄉路歸何早雲間早擅名思親盧橘熟帶雨客帆輕夜火臨津驛晨鐘隔浦城華亭養仙

羽計日再飛鳴

曉過南宮聞太常清樂

南宮聞古樂拂曙聽初驚烟靄遙迷處絲桐暗辨名節  
隨新律改聲帶緒風輕合雅將移俗同和自感情遠音  
兼曉漏餘響過春城九奏明初日寥寥天地清

禁中春松

陰陰清禁裏蒼翠滿春松雨露恩偏近陽和色更濃高  
枝分曉日靈韻雜宵鐘嵐助爐烟遠形疑蓋影重願符

千載壽不羨五株封倘得迴天眷全勝老碧峰

殷御史堯藩

堯藩秀州人為秀才時許渾寄以詩云相知愧許  
詢寥落向溪濱竹馬兒猶小荆釵婦憒貧獨愁憂  
過日多病不如人莫恤青袍選長安隱舊春再寄  
云直道知難用經年向水濱宅從栽竹貴家為買  
書貧就學多新客登朝盡故人蓬萊自有路莫羨  
武陵春又寄詩云幾載聞名翰墨林為從知己信

浮沉青山有雪諳松性碧落無雲稱鶴心帶月獨  
歸蕭寺遠翫花頻醉庚樓深思君一見如瓊樹空  
把新詩盡日吟元和九年韋貫之掌文柄堯藩被  
黜尚書楊漢公乃貫之前榜門生盛言堯藩屈貫  
之為重收遂登第後從李翹長沙幕府尋為長樂  
令有治績姚合寄詩云故人為吏隱高臥簿書間  
遼縣惟栽藥逢僧只說山此宵歡不歇窮歲信空  
還何計相尋去嚴風雪滿關擢御史官江南甚著

風采有憶江南詩三十章皆蘇杭事樂天所詠江南名郡數蘇杭寫在殷家三十章是也姚合又有送殷侍御遊山南詩云詩境西南勝秋深盡夜蛩人家連水影驛路在山峰地靜雲生石天寒雪覆松我為公府繫不得此相從其詩有宋刻本八十七篇評者謂其句有葩艷微嫌肉豐鶴鵠樓一律獨茂碩而婉不愧初盛遺則

三日贈都上人

曲水公卿宴香塵盡滿街無心修禊事獨步到禪齋細  
草繁愁目繁花逆旅懷綺羅人走馬遺落鳳皇釵

宮詞

吳王愛歌舞夜夜醉嬾娟見日吹紅燭和塵埽翠鈿徒  
令句踐霸不信子胥賢若問長洲草荒蕪無限年

送客遊吳

吳國水中央波濤白渺茫衣逢梅雨漬船入稻花香海  
戍通鹽鼈山邦帶蜜房欲知蘇小小君試到錢塘

和趙相公登鶴雀樓

危樓高架次寥天，上相間。登立綵旃樹色到京三百里。  
河流歸漢幾千年，晴峰聳日當周道。秋穀垂花滿舜田。  
雲路何人見高志，最看西面赤闌前。

韓信廟

長空鳥盡將軍死，無復中原入馬蹄。身向九泉還屬漢，  
功超諸將合封齊。荒涼古廟惟松柏，咫尺長陵又鹿麋。  
此日深憐蕭相國，竟無一語到金闈。

送白舍人渡江

曉發龍江又一程  
諸公同濟似登瀛  
海門日上千峰出  
桃葉波平一棹輕  
橫鎖已沈王濬筏  
投鞭難阻謝玄兵  
片時喜得東風便  
回首鐘聲隔鳳城

李節度平戎詩

百萬王師下日邊  
將軍雄畧可圖全  
元勲未論封茅異  
捷勢應知破竹然  
燕營無烽清朔漠  
秦文有寶進藍田  
太平從此消兵甲  
記取紅羊換劫年

金華先生集卷一  
贈惟儼師

煥然文采照青春一策江湖自在身雲鎖木龕聊息影  
雪香紙襖不生塵談禪早續燈無盡護法重編論有神  
擬掃綠陰浮佛寺杪櫂高樹結為鄰

寄海陽張明府

春草正萋萋知君道惡溪鶩將吉了語猿共果然啼別  
路魂將斷還家夢幾迷定尋雷令効應識越王笄樹色  
多於北潮聲少向西榴花好為酒誰伴醉如泥

偶題

越女收龍眼  
蠻兒拾象牙  
長安千萬里  
走馬向誰家

憶家

樹擁溪邊閣  
山浮雨後嵐  
白頭歸未得  
夢裏望江南

江行

暝色滄洲迴  
秋聲玉峽長  
只因江上月  
不覺過潯陽

吹笙歌

伶兒竹聲愁  
繞空秦女淚  
溼燕支紅玉  
桃花片落不住

三十六簧能喚風

遊山南寺

山中盡日無人到竹外交加百鳥鳴昨日小樓微雨過

櫻桃花落晚風晴

殷堯菴

堯菴未詳疑即堯藩兄弟行也府試一詩見詩雋  
類函他本作堯藩詩今附識於此

府試中元節觀道流步虛

玄都開祕錄白石禮先生上界秋光盡中元夜景清星  
辰朝帝處鸞鶴步虛聲玉洞光常發珠宮月最明掃壇  
天地肅投簡鬼神驚倘賜刀圭藥還成不死名

茅山隱君顧非熊

非熊况子性滑稽好凌轢為衆所抑然名在朝野  
長慶中下第名流多作詩送之姚合詩云失意尋  
歸路親知不復過家山向城遠日月在船多楚塞  
數逢雁浙江長有波秋風別鄉老還聽鹿鳴歌朱

慶餘詩云但取詩名遠寧論下第頻惜為今日別  
共受幾年貧聽雨宿吳寺過江逢越人知從本府  
薦秋晚又辭親馬戴詩云無成西別秦返駕江南  
春艸際楚田雁舟中吳苑人殘雲挂絕島迴樹入  
通津想到長洲日門前多白蘋穆宗怪無非熊名  
詔有司進所試卷覽之稱旨追榜敕賜及第劉得  
仁賀以詩云愚為童稚時已解念君詩及得高科  
晚須逢聖主知花前翻有淚鬢上却無絲從此東

歸去休為墮葉期大中間歷盱眙尉唐球送其之  
官詩曰寂寞邛城夜寒塘對庾樓蜀闕蟬已噪秦  
樹葉應秋道路連天遠笙歌到曉愁不堪分袂後  
殘月正如鉤後慕父風棄官亦隱茅山項斯贈詩  
云吟詩三十載成此一名難自有恩門入全無帝  
里歡湖光愁裏碧巖影夢中寒到後千松月何人  
共曉看賈島寄詩云知君歸有處山水亦難齊猶  
去瀟湘遠不聞猿狹啼穴通茅嶺下潮滿石城西

獨立生遙思秋原日漸低王建贈詩云江城柳色  
海門烟欲至茅山始下船知道君家當瀑布菖蒲  
潭在草堂前初况喪子為詩哭之云老人哭愛子  
日暮千行血心逐斷猿驚迹隨飛鳥滅老人年七  
十不作多時別其子雖卒魂神常在其家因自誓  
當再為顧氏子一日冥吏斷令託生顧家開目認  
其屋宇兄弟至七歲其兄戲批之忽曰吾爾兄也  
何敢批吾因叙生前事無一謬者即非熊也其詩

舊刻僅十七篇今得七十四首評者謂其近體俊婉可諷壘削之功似多於真逸矣

題馬儒父石門山居

尋君石門隱山近漸無青鹿迹入柴戶樹身穿草亭雲  
低收藥徑苔惹取泉瓶此地客難到夜琴誰共聽

經杭州

郡郭遙江濱人家近白雲晚濤臨檻看夜艤隔城聞浦  
轉山初盡虹斜雨未分有誰知我意緒逐鷗羣

卷一  
夏日會修竹段將軍宅

愛君書院靜莎覆鮮苔濃連穗古藤暗領離幽鳥重尊  
前迎遠客林杪見晴峰誰謂朱門內雲山滿座逢

姚巖寺路懷友

路向姚巖寺多行洞壑間鶴聲連塢靜溪色帶村閒疎  
葉秋前渚斜陽雨後山憐君不得見詩思最相關

早雁

逐暖來南國迎寒背朔雲下時波勢出起處陣雲分聲

急奔前侶行低續後羣何人寄書札絕域可知聞

寄費冠卿

先生九華隱鳥道隔塵埃石室和雲住山田引燒開久  
閒仙客降高臥詔書來一入深林去人間更不回

秋日陝州道中作

孤客秋風裏驅車出陝西關河午時路邙落一聲雞樹  
勢標秦遠天形剗岳低誰知我名姓來往自淒淒

經河中

一望蒲城路闊河氣象雄樓臺山色裏楊柳水聲中思  
起懷吳客行斜向磧鴻我來尋古跡惟見舜祠一作遺風

天河閣到啼猿閣即事

萬壑褒中路何層不駕虛溼雲和棧起樵柄帶禽餘巖  
狹牽垂果湍禽接逆魚每逢維艇處塢裏有人居

夏夜漢渚歸舟即事

扁舟江瀨盡歸路海山青巨浸分圓象危檣入衆星雨  
遙明電影蜃曉識樓形不是長遊客那知造化靈

下第後寄高山人

我家堂屋前仰視大茅巔潭盡鳥聲異地寒松色鮮人  
眠甕牖月鹿飲竹門泉多愧隣高隱無成又一年

寄太白無能禪師

太白山中寺師居最上方獵人偷佛火櫟鼠戲禪牀定  
久衣塵積行稀徑草長有誰來問法林杪過斜陽

送馬戴入華山

古木亂重重何人識去蹤斜陽收萬壑圓月上三峰雲

裏泉縈石窗間鳥下松惟應採藥客時向此相逢

送僧歸洞庭

江山萬萬重歸去指何峰未入連雲寺先齋越浪鐘島  
香迴棧橋秋蔭出庵松若救吳人病須降震澤龍

長安清明言懷

明時帝里遇清明還逐遊人出禁城九陌芳菲鶯自嚦  
萬家車馬雨初晴客中下第逢今日愁裏看花厭此生  
春色來年誰是主不堪憔悴更無成

瓜洲送朱萬言

渡頭風晚葉飛頻君去還吳我入秦雙淚別家猶未斷  
不堪仍送故鄉人

張堰官祐

祐字承吉清河人作宮體小詩辭曲艷發長慶中  
為令狐楚所知以詩三百篇薦於朝為元稹所抑  
失意東歸嘗領嘉興冬瓜堰稅堰在郡東北二里  
冬瓜湖上一作東瓜又作東郭雲溪友議云祐為

冬瓜堰官多取給於牛戶錢唐酒徒朱冲和為詩  
嘲之曰白在東都元已薨蘭臺鳳閣少人登冬瓜  
堰下逢張祜牛屎堆邊說我又能又桂苑叢談載祜  
以詩上益牢使出其子為漕渠小職得堰號東瓜  
人或戲之曰賢郎不宜作此等職祜曰冬瓜合出  
祜子又按嘉禾志舊堰官張祜死嘉興監裴洪慶  
命其子杞兒領之則祜固終老於禾者也

題海鹽南館

考見題咏

故人營此地臺館尚依依黑夜山魈語黃昏海燕歸舊  
陰楊葉在殘雨槿花稀無復南宮賞高簷紅燭輝

題嘉興蘇小小墓

漠漠窮塵地蕭蕭古樹林臉濃花自發眉恨柳長深夜  
月人何待春風鳥自吟不知誰共穴徒願結同心

蘇小歌三首

車輪不可遮馬足不可絆長怨十字街使郎心四散  
新人千里去故人千里來剪刀橫眼底方覺淚難裁

登山不愁峻涉海不愁深中榜庭前棗教郎見赤心

嘉興縣男陸展

辰字祥文贊族孫光啟二年進士累遷翰林學士  
屬辭敏速若注射然一時詞臣皆以為不及昭宗  
甚寵異之常侍金鑾作賦帝嘆曰朕聞貞元時有  
陸贊能作內廷文書今得卿斯文不墜矣遷尚書  
左丞同中書門下平章事進階光祿大夫嘉興縣  
男後貶濮州司戶死於白馬驛有集七卷今存一

篇

禁林聞曉鶯

曙色分層漢鶯聲繞上林報花開瑞錦催柳綻黃金斷續隨風遠間關送月沈語當溫樹近飛覺禁林深繡戶驚殘夢瑤池轉好音願將棲息意從此沃天心

裴節度休

休字公美孟州人操履嚴正終年著書擢進士第為監察御史文宗太和六年進同中書門下平章

事詢按歲漕著新法十條又立稅茶十二法人以為便秉政五年不為皦察為人醞藉能文章書道媚有體宣宗常曰休真儒者嗜浮屠法當時嘲薄之而所好不衰晚年披毳衲於歌姬院持鉢乞食以為樂後罷為宣武軍節度使卒每自發願世世為國王弘護佛法後于闐國王生一子手文中有一裴休二字聞於中朝其子弟請迎之彼國不允而止按休寓未見本傳今郡城南有真如寺相傳

為休捨宅所建湖上有裴島為休游宴之地攷其父肅貞曾為淵東觀察使則僑居於此固未可知郡邑志皆失載余為入之

題銅官山長史祠

潯陽賢太守遺廟古溪邊樹影赴流水石門當洞天幡花凝寶座香案儼爐烟若到千年後重修事宛然

贈黃蘖山僧希運

自從大士傳心印額上圓珠七尺身挂錫十年棲蜀水

浮杯今日渡漳濱一千龍象隨高步萬里香華結勝因  
擬欲事師為弟子不知將法付何人

五代

屠指揮瓊智

瓊智字寶光海鹽人少負勇略吳越王兵拒黃巢  
智仗劒從之時與謀議授指揮使乾寧四年自海  
道救嘉禾生擒賊將二十餘人天復二年徐綰許  
再忠叛刺史高彥遣子渭與智同赴難渭曰今日

不利智按劍曰違主之命不忠畏縮不前無勇死  
忠死勇丈夫分也偕渭直抵靈隱山賊壘合圍數  
重二人自朝戰至日晡身創百處奮刀一呼手搏  
賊魁數人馬上刃之矢盡援絕為伏兵所害

詠志詩

輕身都是義殉主始為忠一夜西陵路朱旗走大風

唐畫士希雅

希雅嘉興人善丹青妙於畫竹羽毛亦工墨作棘

針始學李後主金錯書有一筆三過之法晚年變而為畫乘興縱奇因其顫掣之勢以為竹樹故書法存焉其為荆檳枯棘荒野幽尋之屬氣韻蕭疎多得真趣非畫家繩墨所拘評者謂江南絕筆徐熙唐希雅二人而已極乎神而盡乎微資於假而迫於真象生意端形造筆下故列神品宣和內府所藏八十有八有竹鹿蘆鴨鷹猴柘雀等圖其同時有陸晁者亦禾人性疎逸好交尚氣沈湎於酒

亦善丹籜凡酒酣遇筆揮灑自得善人物喜為數  
稱如三仙四暢五老六逸七賢之類是也南唐李  
煌聞其名欲召之人謂其嗜酒無人臣禮乃止宣  
和畫譜載晃有繡綫圖及火龍烹茶葛仙飛錢諸

蹟

題畫

誰皴烟雲六尺綃寒山秋樹晚蕭蕭十年來往吳淞口  
錯認溪南舊板橋



稿李詩繫卷一

欽定四庫全書

集部

檇李詩繫卷二

詳校官侍講臣王燕緒

主事銜臣徐以坤覆勘

總校官進士臣

朱鈴

校對官編修臣

繆晉

謄錄監生臣

繆汝芬

欽定四庫全書

檇李詩繫卷二

平湖沈季友編

宋

呂進士謗

謗嘉興人天禧初登進士第後天聖景祐間二弟曰詢曰評相繼登進士皆有名於時嘉興登進士者自其兄弟三人始盛

題閻立本北齊校書圖

由余入秦毀詩書意在兵強黔首愚弊極焜燾無餘  
高齊風俗元自殊豈料乃喜知卷舒况復是正叢冠裾  
公言所貶固不虛我獨謂其勝由余

聞人郎中安道

安道字彞庚嘉興人寶元戊寅進士稟性沈雋不  
輕笑語博覽羣書尤精禮樂監睦州酒稅趙清獻  
公為守知其賢遂與定交通判歙州時方行青苗

錢散及一萬加俸安道曰吾不能去官然亦不願  
加俸歷官職方郎中知南康軍罷歸與東坡溫公  
交善詩箇往來最多云

題招提院靜照堂

考見題咏

白茅結宇自粼粼靜照初題梵字新已向萬緣無斷處  
應為一念不生人風幡蕩漾原非動水月澄明未是真  
宴坐經行惟此地箇中消息與誰親

聞人博士安壽

安壽嘉興人以父建蔭國子博士

題靜照堂

名藍小隱愜高情雅構堂深豁眼明萬慮平時身可外  
一軒安處道初生花紫寶砌當春盛香滿金爐入座清  
復有高人乘興至為題佳句遍雕甍

白牛居士陳舜俞

舜俞字令舉嘉興人慶歷中舉進士嘉祐間中制  
科第一僉書壽州判官司馬溫公贈詩云海隅方

萬里豪雋樂何人百沐求才盡三熏得士新聲華  
四方聳器業一朝伸他日蒼生望非徒澤壽春熙  
寧初以屯田員外郎知山陰青苗法行不奉令上  
疏自劾責監南康酒稅在貶所日與太博劉凝之  
跨雙犢窮泉石之勝李伯時畫為圖休寧吳倣題  
詩曰汗血聲利場舉世循一軌霜風老轂轂松路  
石齒齒牛瘦僕夫疲累累山谷裏兩翁非病狂顧  
獨不取彼牛背有佳處未可語俗子夷齊向千載

凜凜有生氣試問齊景公烏用馬千駟及歸嘗乘  
白牛往來溪上自號白牛居士鄉人因名其居曰  
清風涇東坡有和陳賢良詩云不學孫吳與六韜  
敢將駕馬並英豪望窮海表天還遠傾盡葵心日  
愈高身外浮名休瑣瑣夢中歸思已滔滔三山舊  
是神仙地引手東來一釣鼈舜俞有小鬟曰妙奴  
一日於西湖放舟宴秦少游出以佐酒少游贈之  
詩云西湖水滑多嬌媚妙奴十二正芬芳肌膚晳

白鬚脚長含語未發先有香溪上夜宴侍簪裳皎  
如華月墮滄浪音聲入雲能斷腸不許北客辭酒  
漿主人藹藹邦之良少年射策謁未央俊詞偉氣  
森開張玉杓貫斗生怒芒天欲文采老更昌故使  
斂翮翫羣翔五十僅補尚書郎浩歌騎牛倚徜徉  
東風戲雨花草狂一溪泱泱青黛光妙奴勿倦侑  
羽觴主人正欲遊醉鄉又韓魏公有答陳舜俞推  
官求全瓦古硯詩云鄴宮廢瓦埋荒草取之為硯

成堅好求者如麻幾百年宜乎今日難搜討吾邦  
匠巧世其業能辨瓊竒幼而老隨材就器固不遺  
大則棟梁細棼橑必須完者始稱珍何殊巨海尋  
三島荆人之璧尚有瑕夏后之璜竟無考況乎此  
物出坏陶千耕萬斲常翻攬吾今所得不尗全祕  
若英瑤藉文練君詩苦擇未如意持贈只虞咍絕  
倒君不見鎮圭尺二瑁四寸大小雖異皆君寶及  
卒蘇軾為文哭之稱其學術才能兼百人之器將

以身任天下事而一斥不復士大夫識與不識皆  
淡悲之梅聖俞有詩悼之云書對三千字恩科第  
一人鯤魚飛北海龍劒躍平津直悟崇文主深論  
險尅臣已能明世弊何怍幕中賓所著有都官集  
廬山記行記

題婁億墓

彼何人之門兮雁行馬車老夫懷金兮童子紆朱其取  
萬鍾兮不差毫銖庖有梁肉兮腹無圖書天之生此兮

何罪何辜句讀其話言兮節丈其步趨抱筆而宵吟兮  
鋪楮而晝塗天子招其以召兮鄉人勉呼衆肩相煦磨  
兮疾駕爭馳驅有司五上吾名兮禮部曾不一如退將  
羸其角兮進且跋其胡兮年幾六十兮僅免為白徒一  
秩不能勝兮朝強而暮殂考妣其謂我何兮遑悼妻與  
孥高者我難諒兮厚者行難語諸百恨寂默兮秋草之  
墟

附考墓在嘉善胥山五都今名妻  
坟億為機之曾祖宋參知政事也

保聖院

門深鎖蒼苔地靈育嘉樹寂然烟雲宅不接朝市路苟能灰心居即是古樂處

林屋洞

洞天三十六第九曰林屋神仙固難名瓊恆存記錄曠歲懷尋賞茲辰幸臨矚馳神在真游豈復惄深谷解襪納芒履燃松命先燭初行已僵僂漸入但匍匐顧瞻避衝磕渾沌沒手足如此百餘步始可立寓目或垂若鐘

巖或植若旌纛有如案而平有類几而曲鐫刻非人工  
晶瑩粲黃玉遙知竅穴外定有金庭錄凡肌不可往叩  
擊安敢躡鸞鳳無消息但見白蝙蝠却還望微明既出  
猶喘促沾衣憐石髓孰悔泥塗辱庶幾達微慕養生相

吾福

毛公壇

古壇疊亂石草木何叅差黃衣宇其旁陳迹刊豐碑日  
初劉真人齒髮不可訾但見紺綠毛被體鬟鬟垂雲騎

一日去空山留庭壪弟子散巖谷荆榛蔽荒基晚有周  
息元探訪親斬披白鹿忽跪前靈符見歲蕤地勝人既  
偶凝嚴起宮祠東帛下幽聘良馬維素絲前朝揖高風  
有美皮陸詩殆今三百年事去物亦陳喬松委樵蘇野  
蔓號狐狸惟有煉丹井甘冽無等夷一酌匪消渴欽慕  
尚神禧

右二詩見盧  
熊蘇州府志

題秋浦亭

牢落真秋浦江山滯客舟身同雁南去心似水東流鷗  
鳥荒烟裏漁人古渡頭只因山色好來上九華樓

題碧鮮亭

瀟灑闌干碧玉叢頻來遊賞似兒童紫迴脩竹掠清影  
刻畫新詩遶翠筒十載雪霜林色改幾番風月酒尊空  
子猷老去心長在終擬為隣作醉翁

附考 一名碧蘇亭在嘉興治東三十六里淨  
土寺五代時為漢南王宅宋祥符中賜額

槎洲

聞說槎洲似沃洲一溪分作兩溪流長橋跨岸虹垂地  
高閣凌空蜃吐樓浩蕩乾坤供醉眼淒涼風雨送行舟  
憑誰為問槎邊客未必無人犯斗牛

青龍江醉眠亭

酒擔長輕六印腰醉中一枕敵千朝興亡貌比榮枯柳  
聚散看同且暮潮清興本應塵外得香魂徒向水邊招  
已聞佳士過從約不為東風返畫橈

題廬山醉石

暭暭飛泉清遠石悠悠天末翠鋪空是非分付千鍾裏  
日月消磨一醉中柳絮任飄荒逕畔菊花仍在舊籬東  
水聲山色年年好甚使遊人心素風

谷簾泉

玉簾鋪水半天垂行客尋山到此稀陸羽品題真黼黻  
黃州吟咏盡珠璣重來一酌非無分未挈吾餅可忍歸  
終欲窮源登絕頂帶雲和月弄清暉

弄水亭

未識貴池好嘗聞弄水名白鳥鑑中立畫船天上行

廬山棲賢寺

辟蛇行者應開寺拭眼高僧尚有墳龍去雨歸三峽水

鳥銜花出五峰雲

錢御史顥

顥字安道無錫人治平末為殿中侍御史王安石  
新法行顥極言其弊坐貶秀州遂卜居焉家貧母  
老每貸親舊以給朝哺蘇軾贈詩有烏府先生鐵

作肝句目為鐵肝御史又有長歌贈之兼寄其弟  
惠山山人云駕央湖邊月如水孤舟夜榜鶯央起  
平湖繫纜石橋亭慙愧冒寒鬚御史結交最晚情  
獨厚論心無數今有幾寂寞抱闋嘆蕭生者老孰  
戰哀揚子恠君頽采却秀發無乃遭謫反便美天  
公欲困無奈何世人共抑真疎矣毘陵高山錫無  
骨陸子遺味泉水齒賢哉仲氏早拂衣占斷此山  
長洗耳山頭望湖光潑眼山下濯足波生指倘容

逸少問金堂記與嵇康留石髓嘉興李巨山顚甥  
也東坡過顚小酌其女數歲以領巾乞詩坡即書  
一絕云臨池妙墨出元常弄玉嬌姿笑柳娘吟雪  
屢曾驚太傅斷絃何必試中郎

題爛柯山

春郊雜遝擁紅旌共訪仙蹤嘯傲行雲徑直從深崦入  
石梁宛在半霄橫巖邊瑤圃新開出洞裏芝田舊種成  
羽客一枰無復見青山留得爛柯名

沈秀州括

括字存中湖州人嘉祐中進士累官龍圖學士博  
學洽聞凡律樂醫卜諸家皆有論著嘗使契丹圖  
其山川風俗上之元祐間謫知秀州卒柳志收入  
流寓今仍之

秀州秋日

草滿池塘霜送梅林疎野色近樓臺天圍故越侵雲盡  
潮上孤城帶月回客夢冷隨楓葉斷秋心低逐雁聲來

流年又喜經重九可意黃花是處開

歎老

為覓少年心不得當時感舊已潛然情懷此日君休問  
又老當時二十年

鄜延凱歌五首

先取西山十二州別分子將打衙頭回看秦塞低如馬  
漸見黃河直北流

天威養地過黃河萬里羌人盡漢歌莫堰橫山倒流水

從教西去作恩波

馬尾胡琴隨漢車曲聲猶自怨单于彎弓莫射雲中雁  
歸雁如今不寄書

旗隊渾如錦繡堆銀裝背嵬打回回先教淨掃安西路  
待向河源飲馬來

靈武西涼不用圓蕃家揔待納王師城中半是闢西種  
猶有當時軋吃兒

郭樞密三益

三益字慎求海鹽人元祐三年進士為常熟丞時  
常平使者調蘇湖常秀四州人濬青龍江三益所  
部前期告辦使者留之使助他邑三益竟引歸後  
累官刑部尚書同知樞密院事

題紫籜山廣度院

羲和均四時曜靈有急節沈迷簿領書坐歎春事歇及  
茲新雨收西郊輶初發蒼頑山氣嘉奔悍溪流活風驚  
麥翻浪水淨秧抽髮漸窮蕭寺遠頓使煩襟豁蜂喧釀

蜜翅鳥落啼林血高僧日無事種植畦畝潤綠苗已紓  
紓紫花行復結吾欲訪長生終歲期採擷

題天台寒巖

道人棲碧山雲歸在空曲十年海潮音外物緣已熟時  
擣貝葉書步入深林讀宵眠護神虎晝引穿花鹿庵中  
三昧語藥我貪癡毒何當脫雙鳬藜杖追高躅

題南山寺

洗光朝日上旋旋瑞色分臨此地先門迴帆收江市密

山深龍臥海潭圓淨然柏子聽幽偈閒立苔痕問小禪  
莫訝潮平歸渡晚斯遊有意已三年

題南岳

古木陰森梵帝家簾泉一酌試新芽官符星火催春焙  
却使山僧怨白蛇

華亭逸人李甲

甲字景元居海鹽華亭鄉後析平湖自號華亭逸人善  
為填詞小令有聞於時畫翎毛有意外趣海岳外

史嘗稱之東坡題其畫曰郭恕先之後一人而已  
嘗畫竹於嘉興景德院東坡過之題詩曰聞說神  
仙郭恕先醉中狂筆勢瀾翻百年寥落何人在只  
有華亭李景元甲亦有和詩見柳志又晁無咎有  
題周彥兼所收李甲畫三絕鵲云上林花妥逐鶯  
飛愁絕江南雪裏時嚙噙何須傍簷喜筵懇相對  
兩寒枝雁云網羅無限稻粱肥憐爾冥冥亦庶幾  
戲鴨眠鳧滿中沚衡陽無意更南飛鴨云急風吹

雪滿汀洲近臘淮南憶舊遊小鴨枯荷野艇冷去

年今日凍高郵

題竹和東坡韻

翠葉形竿已占先湘雲千疊勢爭翻野夫不識天人面  
知是虞皇第幾元

毛秀州滂

滂字澤民江山人政和間守郡因家焉先是元祐  
中東坡守杭滂為法曹秩滿辭去是夕東坡宴客

有妓歌惜分飛詞問誰所作妓以毛法曹對東坡語坐客曰郡寮有詞人不及知某之罪也翼日折東留連滂因此得名滂嘗受知曾文肅擢宣館閣文肅南遷坐黨與得罪流落久之蔡元度鎮潤州與滂俱臨川王氏婿滂傾心事之唯謹一日家集觀池中鴛央元度賦詩末句云莫學飢鷹飽便飛滂和曰貪戀恩波未肯飛元度夫人笑曰豈非適從曾相公池中飛過來者耶滂慙不能舉首高郵

陳造題其東堂集云韻語精淡婉雅視秦黃晁張  
蓋不多愧其板刊於嘉禾郡庫予校文時得寶藏  
之

詠桂

玉堦桂影秋綽約天空為捲浮雲幕婵娟醉眠水晶殿  
老蟾不守餘花落蒼苔忽生霜月裔仙芬淒冷真珠萼  
娟娟石畔為誰妍香霧著人清入膜夜深醉月寒相就  
茶蘼却作傷心瘦弄雲仙女淡綺衣烟裾不著鴛央繡

眼中寒香誰同惜冷吟徑召梅花魄小蠻為洗玻璃杯  
晚來秋甕葡萄碧

響應山禱雨寄東坡

雪意不肯休垂垂閣雲端餘暖蒸衣裘勢作隨指寒曉  
黃陰雲來俄忽急雨寢空堦答檐語跳珠上闌干世尊  
儼無說凍坐誰為歡蕭條僧舍影癡兀依蒲團相照憐  
短檠坐恐膏油乾勞生竟何如歲月如走丸七星在長  
劍細事何足彈尚想丘園人慙頰時一丹徘徊經屠門

飽意只自謾顧唯揮牛刀庶足厭一餐不然學農圃趁  
此筋力完年豐得飽飯日晏眠茅莞咄嗟萬里空俯仰  
百歲彈行止信流坎所遇隨足安勲名片紙薄天地如  
瓢簞離騷幸相逢濁酒聊自寬誰與談此心夜氣方漫  
漫絕牆過飢鼠翻倒爭餘殘

紅梅

何處曾臨阿母池深將絳雪點寒枝東牆羞煩逢誰笑  
南國駝顏強自持

碧玉潭

水面平波一境空  
夜深明月照龍宮  
猿聲未響潭先響  
一樹花開兩樹紅

定光禪院

曉出閑霜阪  
飢鳥啄麥畦  
山腰餘雪瘦  
天面冷雲低  
寒意梅花北  
禪心柏子西  
窗前借殘月  
照我渡前溪

陳學士與義

與義字去非汝州人政和初登第宣和中徽宗見

其賦墨梅詩遂登冊府厯徽猷閣直學士知湖州  
紹興間掌內外制參知政事乞外除資政殿學士  
復知湖州卜居崇德青墩鎮

後折  
桐鄉

築簡齋居之遂

號簡齋與義不妄言笑接人甚和而中不可犯薦  
士不使人知其出處氣節翰墨文章為中興大臣  
之冠當時風雅幾廢與義獨以詩名有簡齋集評  
者謂元祐後詩人迭起一種則波瀾富而句律疎  
一種則煅煉精而性情遠要之不出蘇黃二體而

已及簡齋出始以老杜為師建炎以後避地湖嶠行路萬里詩益奇壯造次不忘憂愛以簡嚴掃繁縟以雄渾代尖巧第其品格自當在諸家之上劉辰翁為序而傳之吳草廬題其奏橐後云君臣密勿紹興中文物依稀貞觀同三幅奏篇存雅製諸家題字總名公已聞玉匣人間見空想銀鈎天上工百八十年如一夢摩挲遺墨視蒙蒙去非少學詩於崔鷗德符嘗請問作詩之要崔曰凡作詩工

拙所未論大要忌俗而已天下書雖不可不讀然  
慎不可有意於用事去非亦嘗語人言本朝詩人  
之詩有慎不可讀者梅聖俞有不可不讀者陳無  
己也見宋睢陽徐度却掃編

題簡齋

我窗三尺餘可以閑晦明北省雖巨麗無此風竹聲不  
著散花女而况使鬼兄世間多歧路居士繩牀平未知  
阮遙集幾屐了平生領軍一屋鞋千載笑絕纓槐陰自

卷二  
入戶知我喜新晴覓句方未了簡齋真虛名

美哉亭

西出成臯關土谷僅容駝天挂一匹練雙崖鬪嵯峨忽然五丈闕亭構如危巢青山巖中原白日照大河下視萬里川草木何其多臨高一吐氣却奈雄風何辛苦生一快造化巧揣摩險易終不償翻身下殘坡

出山道中

雨歇澹春曉雲氣山腰流高厓落絳葉恍如人世秋避

地時忽忽出山意悠悠溪急竹影動谷虛禽響幽同行  
得快士勝處頻淹留乘除了身世未恨落房州

留別天寧永慶乾明金鸞四老

我生能樂何兩脚疲世故忽破巴丘夢還尋邵陽路窮  
鄉得四老足以慰遲暮勝事遠公蓮深心懶殘芊本是  
羣山雲暫聚常別去那知天風便不得還相聚凡情我  
未免臨別吐幽句慎勿過虎溪曉霜侵杖屨

別岳州

朝食三斗葱葷飲三斗醕寧受此酸辛莫行歲晚路大  
夫少壯日忍窮不自恕乘除冀晚泰乃復逢變故經年  
岳陽樓不見南宮樹辭巢已萬里兩脚未遑住水落君  
山高洞庭秋已素浮雲易歸岫遠客盡回顧飄然一瓶  
錫未知所挂處寂寞短歌行蕭條遠遊賦學道始恨晚  
為儒孰非腐乾坤杳茫茫三歎出門去

偶成古調十六韻上呈判府兼贈劉興州

稽首蘇耽仙乘雲去無迹尚留橘井在與世除狂疾誰

能不飲此識味亦可錄坐令鄭玄牛亦抱荆山玉偉哉  
稚川裔神交接朝夕游戲及小道造化入大筆優為吳  
詩父雅命楚騷僕豈其橘井助本自同仙錄坐中有劉子  
知是當時客書懸元和腳語經建康力先我登公門  
不數鶩鳥百曾挹兩仙袖自然生羽翼嗟我無長才學  
架屋下屋詩雖兩牛腰事亦樂蛇足已窮猶不悔政荷  
師友德文盟倘許余幸不疑藉湜

再用迹字韻成一首呈判府

風雨一葉過黃花已陳迹人貧交舊疎歲暮日月疾貪人積胡椒智不到鬼錄那知庾郎菜地瘦飽金玉不如學服氣清坐了晨夕尚餘烟月債驅使入吟筆晚逢葛先生憐我出無僕借車得時詣謬窺文字錄談詩不知疲或作夜半客揮毫寫瑤玉治郡蓋餘力不羨江千萬不慕李八百願傳公句法容我附風翼城東劉子政著書方滿屋昨示一篇詩三日歎未足仍聞供筆硯家有樊通德但恐裴公門從此近捨湜

廣福院晚眺

考見  
題咏

澤國候易變孟冬乃微和解襟凭小閣日暮歸雲多蒼  
蒼散草木莽莽雜山河荒野蟲亂鳴長空鳥時過萬象  
各有待唯人顧紛羅備物以養已更用干與戈天風吹  
我來衣袂生微波幽懷渺無寄蕭瑟起悲歌

荔枝

炎精孕秀多靈植荔枝佳名聞自昔絳囊剖雪出雕盤  
尋常百果無顏色閩天六月雨初晴星火熒熒耀川澤

歛如彩鳳戲翹翔爛若形雲堆翕燁中郎裁品三十二  
陳紫方紅冠儔匹鹽蒸蜜漬尚絕倫啄瓊空羨南飛翼  
我聞政和全盛時貢輸不減開元日涪州距雍已云遠  
况此奔馳來海側繡衣使者動輞車黃紙封林遍阡陌  
浮航走轍空四郊妙品人間無復得似聞供給只纖毫  
往往盡入公侯宅驪山廢苑狐兔靜良獄新宮鼙鼓急  
繁華今古共淒涼遙樹行吟悲野客西風刮地戰塵昏  
一聽胡笳雙淚滴

陰風

陰風三日吹南極二月巴陵寒裂石長林巨木受軒輕  
洞庭倒流瀟湘黑君不見古廬竹扉聲策策中有吟  
落南客曾經破膽向炎官敢不脩容待風伯

初至陳留南鎮夙興赴縣

五更風搖白竹扉整冠上馬不可遲三家坡口雞喔喔  
早於昨日朝天時行雲弄月翳復吐林間明滅光景奇  
川原四望鬱高下蕩搖蒼茫森陸離客心忽動羣雁起

馬影漸薄村墟移須臾東方雲錦發向來所見今難追  
兩眼聊隨萬象轉一官已判三年癡只將乘除了吾事  
推去未枕收此詩寫我新篇作畫障不須更覓丹青師

述懷呈十七家叔

兒時學道逃悲歡只今未免憂飢寒浮生萬事蠭旋磨  
冷官十年魚上竿竹林步兵亦忍辱長安閉門出無僕  
門前故人擁廬兒正坐向來甘碌碌君不見古人有待  
良不多利名溺人甚風波垂露成惟仲長統明月為燭

張志和塵中別多會日少世事欲談何可了胸中萬卷  
已無用勸公留眼送飛鳥兩翁觀光今樂時賦歸有約  
時已稽未暇藏身北山北且須覓地西枝西顧從吾翁  
歸洗耳不用妓女汚山水肩輿亦莫要僕夫自有門生  
與兒子

題唐希雅畫寒江圖

江頭黃雲天醞雪樹枝慘慘凍欲折耐寒野鴨不知歸  
猶向沙邊弄羽衣黃茅終日不自力影亂弱藻相因依

惟有蒼石如臥虎不受陰晴與寒暑舟中過客莫敢侮  
閒伴長江了今古

年華

去國頻更歲為官不救餓春生殘雪外酒盡落梅時白  
日山川映青天草木宜年華不負客一一入吾詩

寒食

草草隨時事蕭蕭傍水門濃陰花照野寒食柳圍邨客  
袂空佳節鶯聲忽故園不知何處笛吹恨滿清尊

雨

雲起谷全暗雨晴山復明青春望中色白澗晚來聲遠  
樹鳥羣集高原人獨耕老夫逃世久堅坐聽陰晴

聞王道濟陷賊

海內堂堂左如今在賊圍虛傳表盜脫不見華元歸浮  
世身難料危途計易非雲孤馬西嶺老淚不勝揮

道中

雨子收還急溪流直又斜迢迢傍山路漠漠滿林花破

水雙鷗影掀泥百草芽川原有高下隨處著人家

懷天經智老因訪之

今年二月凍初融睡起若溪綠向東客子光陰詩卷裏  
杏花消息雨聲中西庵禪伯還多病北柵儒生只固窮  
忽憶輕舟尋二子綸巾鶴氅試春風

送熊博士赴瑞安令

衣冠袞袞相逢處草木蕭蕭未變時聚散同驚一枕夢  
悲歡各誦十年詩山林有約吾當去天地無情子亦飢

笑領銅章非失計歲寒心事欲深期

觀雨

山谷龍鍾不解耕開軒危坐看陰晴前江後嶺通雲氣  
萬壑千林送雨聲海壓竹枝低復舉風吹山角晦還明  
不嫌屋漏無乾處正要羣龍洗甲兵

題東家壁

斜陽步屧過東家便置清尊不煮茶高柳光陰初罷絮  
嫩兒毛羽欲成花羣公天上分時棟間客江邊管歲華

醉裏吟詩空跌宕借君素壁落栖鴟

三月二十日聞德音寄李德升席大光新有召

命皆寓永州

塵闊斗牛三月餘德音冉與萬方初又蒙天地寬今歲  
且掃軒窗讀我書自古安危關政事隨時憂喜到樵漁  
零陵并起扶顛手九廟無歸計莫疎

除夜

城中爆竹已殘更朔吹翻江意未平多事鬢毛隨節換

盡情燈火向人明比量舊歲聊堪喜流轉殊方又可驚  
明日岳陽樓上去島烟湖霧看春生

登岳陽樓

洞庭之東江水西簾鈎不動夕陽遲登臨吳蜀橫分地  
徒倚湖山欲暮時萬里來遊還望遠三年多難更憑危  
白頭弔古霜風裏老木蒼波無限悲

對酒

陳留春色撩詩思一日搜腸一百迴燕子初歸風不定

桃花欲動雨頻來人間多待須微祿夢裏相逢記此杯  
白竹扉前客醉舞烟渺渺欠高臺

感事

喪亂那堪說干戈竟未休公卿危下走江漢故東流風  
斷黃龍府雲移白鷺洲云何舒國步持底副君憂世事  
非難料吾生本自浮菊花紛四野作意為誰秋

絕句

野鴨飛無數桃花溼滿枝竹輿鳴細雨山客有新詩

題池亭

聊將兩蓬鬢起照千丈鏡微波喜搖人小立待其定

墨梅

潔白江南萬玉妃別來幾度見春歸相逢京洛渾依舊  
只是緇塵染素衣

秋夜

中庭淡月照三更白露洗空河漢明莫遣西風吹葉盡  
却愁無處著秋聲

西省酴醿架上殘雪可愛戲同王元忠席大光  
賦

酴醿花底當年事夜雪模糊照酒闌北省今朝枝上雪  
還揩病眼作花看

寶園醉中

海棠脉脉要詩催日暮紫綿無數開欲識此花奇絕處  
明朝有雨試重來

重陽有感

憶得甲辰重九日天恩曾預宴城東龍沙此日西風冷  
誰折黃花壽兩宮

春寒

二月巴陵日日風春寒未了怯園公海棠不惜臙脂色  
獨立濛濛細雨中

次韻傅子文絕句

風雨門前十日泥荒街相伴只筇杖從今老子都無事  
落盡園花不賦詩

尋詩

楚酒困人三日醉園花  
經雨百般紅無人畫出陳居士  
亭角尋詩滿袖風

郊景

黃昏吹角聞呼鬼  
清曉持竿看牧鵝  
蠶上樓時桑葉少  
水鳴車處稻苗多

芙蓉

白髮飄蕭一病翁  
暮年身世藥瓢中  
芙蓉牆外垂垂發

九月憑闌未怯風

代葛亞卿作

君住江濱起畫樓  
妾居海角送潮頭  
潮中有妾相思淚  
流到樓前更不流

青墩看牡丹

考見題咏

一自邊塵入漢關  
十年伊洛路漫漫  
青墩溪畔龍鍾客

獨立東風看牡丹

懷二禪者

殘年不復徙他邦長與兩禪同夜缸坐到更深都寂寞  
雪花無數落天窗

沈學士晦

晦字元用錢塘人徵時徙居崇德舉宣和狀元御試策題舉子不能條對晦精通象數一揮千言祐陵于聞喜宴上以御詩寵之除著作郎金人攻汴從肅王出質後得還為給事中高宗將召為中書舍人有論其布衣時事帝曰頃在金營見其慷慨

士人細行豈足為終身累耶然卒出知平江乞以  
建康太平鎮江池鄂五郡兵連橫守江與韓世忠  
犄角金必不敢渡召募敢戰練習期年京口可成  
強藩趙鼎稱其激昂卒不果用進徽猷閣直學士

終知鄆州

題獨秀山

老鶴下遙天昂昂在林表霜毛臨野人逸氣秋天杳矯  
矯顏始安不受冠帶繞清真自嵇阮一醉萬事了讀書

空谷中生芻白駒皎長峨五君詠極目送飛鳥

竹溪

寒流穿清閟支徑入翠微山深古木合林靜珍禽飛居人本避世遊客亦忘機歸路晚烟暝新月照柴扉

遊松陽百仞山

山頭白雲如擘絮竹雞無聲鳩喚婦團團朝日上林梢  
寒食梨花溪口路一峰獨秀橫溪陰青林倒影千丈深  
上有白龍蟄幽洞歲旱往往能為霖如今寂寞空山裏

古屋荒壇冷紅紫會看前度種花人他年來作巢居子

竹嶺

九月亂山中崎嶇處處同谿流因雨漲木葉著霜紅人  
跡千年絕松聲萬壑空尋幽自可問不復嘆途窮

松陽上方山居五首

月斜樹影穿窗入雨過山泉遶舍鳴野寺中宵人不睡  
蒲團布衲悟無生

山中寒早野陰薄慘慘黃昏欲雨時市遠無人與沽酒

地爐松火自燒梨

天畔羣峰一草亭半溪烟雨花冥冥老翁投老得此景  
日與谿山同醉醒

此生真與世相忘投老生涯寄上方洗足關門枕書睡  
連山松檜雨浪浪

學道空山歲月深丹成初試馬蹄金猶餘一勺丹泉水  
洗盡人間名利心

呂朝士渭老

渭老一作濱老字聖求嘉興人宣和末朝士有集  
不傳僅從趙師秀序其詞中得一詩稱其諷咏中  
卒寓愛君憂國意不但弄筆墨清新俊逸而已又  
有句云憂國憂身到白頭此生風雨一沙鷗又云  
尚喜山河歸帝子可憐麋鹿入王宮人云未湔嵇  
紹血誰發諫臣章縉紳巨賢多錄稿家藏但不窺  
全帙未能為刊行由此序觀之則當時已無鏤本  
矣惜哉

卷二  
傷世

塵斷征車杳雲低毛帳深古今那有此天地亦何心

王尚書希呂

希呂字仲行宿州人高宗南渡寓居嘉興第進士為正言上章劾佞臣張說出知廬州累遷吏部尚書天性剛勁嘗切論近習用事上變色欲起希呂挽御衣極言之致政歸無屋可居上為賜錢造第

入直賦景物

玉堂晝永暑風微  
軟軟飛花落小池  
徙倚幽蘭憑問訊

夏鶯飛出萬年枝

本覺寺三過堂

考見後

門外驚風吹細沙  
入門水氣湛清華  
呼童試向人間看  
巖桂應開第二花

趙都監善應

善應字彥遠又字慶公漢王元佐之後建炎間與  
其父自汴避地崇德之洲錢因家焉洲錢在縣西

北二十七里周遭皆水形如錢布故名南渡時士大夫避地者二十餘家蘇師德呂正已及趙氏父子皆在焉善應生汝愚范令機扁其里曰生賢紹熙中與蘇呂諸公迭主詩盟即祇園精舍為盍簪之所故詩人沈文伯有翠娥環坐憶洲錢之句其生平流離感慨見諸篇什性純孝嘗刺血和藥愈母母畏雷雷輒走護之寒夜歸恐擊門驚母露坐達旦諸弟未製衣必不敢製官江西兵馬都監每

四方水旱警報輒不食尤表稱為古君子陳福公  
題其墓曰篤行

寧師西閣

飄泊南來幾歲寒追談往事漫心酸雲烟暮靄中原望  
歸折梅花忍淚看

次韻李長卿

一別芳洲不計年舊時攀折柳依然故人似欲撩詩興  
勝折梅花向酒邊

聞人主簿僕

憇嘉興人官主簿

題淨因院

湖海浮家二十年重來春色尚依然杏花蘿角紅吹霧柳葉塘腰綠護烟草暖遊人分席地鳩鳴刺史勸農天覺塲獨占三災外試問支郎第幾禪三災兵火盜也建炎兵後惟此院獨存

朱少卿敦儒

敦儒字希真一作希直號巖壑洛陽人少從陳東

野學嘗賦古鏡云試將天下照萬象總分明東野  
奇之為人天性曠達以詞章擅名能書兼善繪事  
布衣時遂有朝野之望靖康亂避地自江西走二  
廣紹興二年詔廣西宣諭明索訪求山林不仕賢  
者橐薦敦儒通達治體有經世之才三召皆固辭  
後復以薦起賜出身為祕書正字遷浙東提刑未  
幾致仕僑居嘉禾構室南湖之濱室中所列琴笙  
阮咸金石名蹟皆目所未覩每貯果核挑以待客

時棹小舟徜徉自放陸放翁嘗詣之聞笛聲自烟波間出行者曰此朱先生吹笛聲也及至檜當國有携敦儒詩及所畫山水謁檜檜欲令敦儒教秦伯陽作詩乃先用其子為刪定官復起敦儒為鴻臚少卿蓋久廢之官也時頗榮遇嘗與米元暉對御作畫而敦儒耻以畫名輒退避不居敦儒舊有鷓鴣天詞曰云是清都山水郎天教嬾慢帶疎狂曾批給露支風勅累奏留雲借月章詩萬首醉千

塲樂曾著眼看侯王玉樓金闕慵歸去且挿梅花  
住洛陽至是人乃為詩誚之云少室山人久挂冠  
不知何事到長安如今縱挿梅花醉未必侯王著  
眼看檜死敦儒亦遭論罷其實敦儒因老愛其子  
而畏避竄逐不敢不起識者憐之周益公謂觀其  
字如其詩其詩如其人不待識面知為伊洛勝流  
矣有樵歌三卷評者稱朱三十五希真五言如剪  
茅編雀屋篩米聚雞糧燈昏鼠窺硯雨急犬穿籬

七言如幾許少年春欲夏一番夢事綠催紅過時  
不語鶯解事怕客深藏魚見機人間萬事老無味  
天下四時秋最愁皆警策不蹈襲云洛中有八俊  
陳簡齋為詩俊朱巖壑為詞俊富季甫為衣俊皆  
一時奇才也南渡以來詩俊衣俊皆為執政大臣  
相與力引獨巖壑骯髒不偶終以退休因作鶴賦  
以自况樓大防題之如此周紫芝有聞希真請老  
詩云平生恨未識朱遊每得新詩慰客愁泛宅清

若真得句挂冠神武更何求又云久厭朱袍裏玉  
仙幅巾藜杖老山間從今魚鳥緣應熟只恐鴛央  
債未還蓋以希真有道人還了鴛央債之句也王

庭珪

字民瞻廬陵人紹興時為台州主管

有和葛主簿寄希真詩云

主簿四海士先生千載人羈遊厭旗鼓談笑出風  
塵高臥屢違旨榮名忽中身清詩何絕妙疊白識

餘辛

小盡行

藤州三月作小盡梧州三月作大盡哀哉官歷今不頌  
憶昔昇平淚成陣我今何異桃源人落葉為秋花為春  
但恨未能與世隔時聞喪亂空傷神

絕句

青羅包髻白行纏不是凡人不是仙家在洛陽城裏住  
臥吹銅笛過伊川

康臺郎與之

與之字伯可嘉興人建炎中駕駐維揚與之上中

興十策聲名大振宰相汪黃輩不能用及秦檜當國擢為臺郎專應制善為樂府時以柳耆卿目之有詞五卷凡中興粉飾治具及慈寧歸養兩宮歡集必假伯可之歌咏嘗與檜對局格天閣下檜戲曰此卒渡河是爾將軍之疥癩伯可應曰今皇御極視公宰相如腹心檜大喜撤碁酣飲而罷檜死與之亦謫五年名勝志云番禺縣玉虹洞之南曰聚龍崗宋嘉興人康與之流五年時居此程史載

其在高宗時與左璫狎適睿思殿有徽宗御畫扇  
上時持玩流涕璫偶下直竊攜至家而康適來留  
之燕飲出以示康康給璫入取看核輒泚筆書一  
絕於上即玉輦宸遊之句也璫出見之大恐而康  
已醉無可奈何明日伺間叩頭請死上大怒亟取  
視之天顏頓霁但一慟而已

鶴舒臺

白雲深鎖路崎嶇鶴去臺空景物殊山展翠屏連綺幕

泉分清溜滴明珠道人只問丹砂井隱客猶尋九節蒲  
試問葛翁昇舉後至今遺跡事何如

王虹洞二首

睡起疎簾一半開更無人迹過青苔須臾蒼狗風前變  
雷雨驅潮出海來

滿山一夜風篁響透屋三更月露寒自掩殘書推枕睡  
江湖秋夢水雲寬

題宣和御畫

玉輦宸遊事已空尚餘金藻繪春風年年花鳥無窮恨  
盡在蒼梧夕照中

題清江松風亭二首

天涯芳草盡綠路傍柳絮爭飛啼鳥一聲春晚落花滿  
地人歸

江上濃陰晚未開瘦筇支我上蒼苔春寒前日去已盡  
今日又從何處來

魯太府嘗

告字季欽號冷齋海鹽當湖鎮人

後折平湖

兄詹崇寧

初進士告與弟荅同舉紹興五年進士人以比二

陸一時弟兄子姪科第之盛甲於一郡其所居起

橋顏曰三登告官至大府卿嘗言支移折變利弊

甚悉詔可其奏於詩喜杜工部嘗取其集考其年

編次而箋釋之為十八卷世所傳魯冷齋杜詩定

本是也及卒呂祖謙有淳熙四年春挽魯少卿告

詩云慶源滾滾接天流老桂傳香次第秋人物西

都九鄉選英華南國十洲遊翛然徑下滕王閣已  
矣長懷范蠡舟身後楚騷誰著錄靈光舊草合兼  
收周必大為作墓志叙其行事甚悉又系之詩曰  
競爽雲間陸應同天上張樂堂聯折桂南省繼含  
香風月三千首金釵十二行初終全五福似續付  
諸郎自慙江南袂思公歲月徂書來懷棣鄂人去  
重葭莩東粵仍閩粵當湖遂鏡湖堂成隨一相浮  
世竟何須告有集今不傳僅從族譜中採得一詩

惜未覩其全耳

觀武侯陣圖

西川漢鼎倚綸巾翠石累累作陣新  
一夜掃雲驚虎旅  
九天飛雨泣龍鱗  
當年已落中原膽  
今日猶憐故國身  
曾踏斜陽看舊壘  
英雄千古只伊人

趙議幕汝能

汝能字公舉海鹽人贅居崇德紹興末舉進士知  
海陵改鬱林州削平巨寇寇所掠金寶盡藏一沼

僚吏請發之笑曰鍾離意以為何如調守全州歷

浙西沿海議幕壽八十自號雲谷道人

題崇福寺羅漢閣

即常樂庵  
考見題詠

粉壁龍蛇渾欲動石橋雲水亦生寒香銷日晚人歸去  
聽盡秋聲到夜闌

李提舉正民

正民字方叔揚州人官朝奉大夫徽猷閣待制提  
舉洞霄宮建炎間高宗東狩四明正民著來游記

以識之其事頗備紹興中寓海鹽善屬文邑中碑  
記多出其手子直養即為海鹽令

海月亭

考見題詠  
海鹽注

危亭注目了無邊脫屣塵寰思杳然萬頃秋濤翻浩渺  
一輪明月對虛圓先生銀漢疑無地望斷蓬壺別有天  
赤水棗花若莫問新詩賡唱似朱絃

題清節軒

考見題詠  
海鹽注

新種修篁翠葉稠凜然清節坐驚秋官曹咸類崔斯立

風味仍同王子猷暫却鷺鶴容退食他時鸞鳳小遲留  
吟哦自是名家事我亦身閒愧食浮

題一擊軒

考見題詠  
鹿苑寺

本來無物可脩持一擊當年何所知拱手問師都不語  
等閒拈起布毛吹

李正士長民

長民字元叔正民弟與兄齊名亦能詩宣和元年  
舉博學宏詞獻廣汴都賦上甚喜二年除祕書省

正字

題一擊軒

我聽風篁是梵音如何俗耳等閒聞自來擊處無人會  
千古知心只此君

王布衣彥和

彥和崇德人工詩有名紹興間其書扇一詩光堯  
見之稱賞令盡進所作賜對以老賸賜金帛

書中貴人扇

天邊一線征鴻沒山色淺深墨未勻別浦漁舟待歸去

夕陽渡口兩三人

張尚書伯垓

伯垓字德象嘉興人紹興庚辰進士官尚書

題崇德莫氏椿桂堂

考見題詠

藝苑從來誇一第至比梯雲仰攀桂弟兄罕見五枝芳  
昔說竇郎今莫氏莫氏一門真可榮二難三秀衆美并  
見者歎羨不易及往往苔兒親短檠

開國侯婁機

機字彥發嘉興人乾道二年進士孝宗朝歷州縣有聲太子就學以機兼資善堂小學教授機手書累朝事親修身治國愛民四事以獻擢御史時蘇師旦怙勢言者皆罪去而獨憚機韓侂胄議開邊機不可御史鄧友龍附侂胄議遂劾去機侂胄誅召為吏部侍郎累遷參知政事封嘉興郡開國侯機慎惜名器愛選人材方當時艱而多彌縫裨贊

之功著有帝王總要班馬字類諸書

題日哦軒

高軒多暇日宴寢獨怡神風俗誰今古雲山自主賓灘  
平分燕尾松老半龍鱗徒倚清陰下吟懷愧昔人

趙忠定公汝愚

汝愚字子直父善應扈蹕南渡遂家崇德靖康丁  
未生汝愚是年孝宗亦生於秀州此南宋君臣基  
命之數也汝愚少有大志每曰丈夫得汗青一幅

始不負此生乾道間舉進士厯給事中知成都府  
分諸羌以弭邊患孝宗謂其有文武才光宗朝為  
吏部尚書同知樞密院事孝宗崩汝愚請成禮上  
疾不從又請憲聖皇后垂簾主喪及建太子會上  
臨朝仆地汝愚復請禪位嘉王以繫人心遂扶立  
寧宗除特進右丞相皆辭乞命朱熹待制經筵悉  
收召士君子之在外者韓侂胄誣其將不利於社  
稷遂之祭酒李祥博士楊簡皆言兩宮隔絕國喪

無主汝愚不避殞身滅族之禍戴翊陛下卒受黯  
黯而去天下後世其謂何乃并罷祥簡太府丞呂  
祖儉太學生楊宏中等皆上表代白悉就編置遂  
貶汝愚於永州至衡州暴卒天下聞而寃之初汝  
愚嘗夢孝宗授以湯鼎背負白龍昇天後翊寧宗  
以素服登大寶蓋其驗也而讒者以為言侂胄誅  
復原官謚忠定贈太師封沂國公理宗詔配享寧  
宗廟庭加封福王所著詩文十五卷行世初汝愚

之死也太學生教陶孫賦詩於三元樓辟云左手  
旋乾右轉坤如何羣小恣流言狼胡無地居姬旦  
魚腹終天弔屈原一死固知公所欠孤忠幸有史  
長存九原若遇韓忠獻休說如今有未孫方擲筆  
飲未一二行壁已昇去陶孫知必為韓所廉項之  
捕者至矣急更衣持酒具下樓與捕者交臂問教  
上舍在否對曰方酣飲亟亡命走閩乃得免

送學士汪大猷歸鄞

尚書天官貴持經侍帷幄青冥欲無際白首非故約連  
檣動南浦父老望巖壑下車入里門執手問歡樂十年  
笑風雨寒雞叫屋角勤勞畢我分帝賚出寵渥殊適奉  
香火禁直連六閣遂令宣室思從今問晦朔

題天風海濤亭

幾年奔走厭塵埃此日登臨亦快哉江月不隨流水去  
天風直送海濤來

題竹贈衛青叔之潭州

颶颶忽見青鸞尾掃遍翠厓岡上頭昨夜月明仙子過

玉笙吹徹萬山秋

致爽軒

濃陰夾道水流渠吹盡殘花不復餘惟有范家千畝竹

青青依舊色侵書

陳提轄炳

炳字宜之閩人淳熙初主崇德簿因居焉遷上虞  
令有西溪濬水利及三鄉參政張綱嘗浚湖刻石

歲久為豪右所據夏大旱民請復豪右阻之炳曰  
令寧以罪去必不忍畏避強禦委棄三鄉民命也  
卒後復之百姓歌曰前復湖張參政後復湖陳縣  
令與我衣食全我命除提轄文思縣有退庵集

資福院平綠軒

考見題詠

水屋圍春綠雲岑送曉青無心向朝市信步到禪扃野  
意連天遠疎鐘隔岝崿行莫辭醉簷月笑人醒

錢循州文

文字文叔崇德人吳越王裔乾道間進士尉當塗  
捕販私茶十數輩法當進秩力辭知萬載縣有異  
政趙汝愚薦可大用不果除知循州卒官朝奉大  
夫文體貌魁偉吐音如鍾言溫氣和廉而好義居  
不蔽風雨餧粥不給晏如也詩亦清麗有則

題梵竺卿蓬居

考見方外

梅繞蓬居不計株水仙數畹鬪芳腴竺卿白業二香妙  
世界紅塵一點無可比遠公蓮社勝應嗟陶令菊園蕪

鑪薰清鼻若澆舌月浸松窗對結趺

莫大理若沖

若沖字子謙崇德人父琮自仁和徙居生五子元忠若晦似之若拙若沖俱得第時比五竇若沖為淳熙進士知安吉吳江有聲除司農簿輪對時用事者議開邊若沖諫阻之出知岳州賑荒剔盜境內帖然知全州漕司檄解軍糧湘源壞高客舟不至遂發官帑造輕舟運之明年靖江大水民賴以

濟最聞除大理丞乞歸有語溪集

初春趙仁甫宴邑官平綠見招

平綠題詩四十年尋幽不厭水雲邊一犁還又耕春後  
三白曾來醉臘前自笑挂冠林下客得陪揮麈坐中賢  
絕嫌幻色撩人思快覩晴川遠接天

過崇勝院

首歲融春卜有秋曉行猶自索貂裘身閒暫脫微官縛  
市隱何如此地幽一水相望三里近十年重到片時留

買田擬作終焉計真是飄然不繫舟

附考在崇德縣東

三里晉徐願捨宅

石門張氏園

考見仙鬼

為米徒勞束帶難當時彭澤便休官高情曾賦歸來句  
盡入名園扁署看

葉太守廷珪

廷珪字嗣忠號翠巖嘉興人紹興十八年由兵部  
郎中出為泉州太守其所著海錄碎事傳安道序

之謂其無一日不作詩老而益工如題琴泉軒云  
不是妙音生妙指只緣流水似流泉無名木云人  
休清樾摩挲認鳥泊高枝睥睨看至其和錢起江  
行百詩士大夫多傳錄之又作郡舍羅漢室詩云  
幾多雁鷺行間吏衙退頻來禮釋迦可以見大府  
之風度矣其自序謂予家本田舍貧無書可讀曾  
祖父以押綱至京市書數十部得盡讀之其後肄  
業郡學升貢上庠入仕四十餘年云茲登一詩出

清河書畫舫

茉莉

露花洗出通身白沈水熏成換骨香近說根苗移上苑  
休慙系本出南荒

莫進士若拙

若拙字子才若沖兄淳熙中進士

平綠軒即事

結屋地猶淺釣簾景盡還嵐光烟樹外野色酒杯間別

墅從渠樂清吟屬我閒狎鷗時點白機事不相關

蔡漕司開

開字子明崇德人淳熙中進士宰德清值軍興征  
調邑不擾知邵武郡初官租一石帶糴四斗備賑  
後為民患開請罷之視時低昂俾民自糴患遂已  
除漕司兼知岳州點軍營田九軍一日而畢又區  
畫營佃軍國兩利改漕江西屬郡旱捐漕計以濟  
卒於官有畏齋集

平綠軒

瞰水地仍敞開窗望不迷良疇連遠近秀野混高低曉  
起煙千樹春耕雨一犁道人深樂此壞衲且幽棲

王教諭用亨

用亨字子安自開封徙居崇德淳熙間舉進士授  
丹陽尉益嗜學如舉子時手抄口誦至忘寢食試  
宏博科與倪思爭衡分教襄陽以根抵之學表率  
士類嘗作二記曰不貪不欺此其行已之實也

平綠軒二首

翠痕幾點出林端，舟撼清流夜月寒。  
却笑監湖臨水寺，閉門不借俗人看。

禪窗虛敞瞰西南，野色溪光接畫簷。  
雲去碧天無間斷，一眉依約見山尖。

衛文節公涇

涇字清叔嘉興人孝宗親擢進士第一厯起居舍人使金還除直煥章閣知慶元府時權奸用事十

年不調開禧初召為吏部尚書御史中丞請誅韓侂胄論罷右相陳自彊拜參知政事胄誅又患史彌遠欲去之彌遠乃諷御史劾罷涇知揚州除資政殿學士卒贈太師追封秦國公謚文節涇嘗請召朱熹還朝而熹已卒乃取諸經四書傳註刊布之所著文章奏議五十卷曰後樂集

過灤湖

疎星殘月尚朦朧閒趁烟波一棹風始覺舟移楊柳岸

直疑身到水晶宮烏鵲天際墨千點白鷺灘頭玉一叢  
歎乃一聲回首處青山渾在有無中

聞人刪定滋

滋字茂德嘉興老儒也陸游老學庵筆記曰茂德  
喜留客食然不過蔬豆郡人求館客者多就謀之  
又多蓄書喜借人自言作門客牙充書籍行閑豆  
腐羹店予少時與之同在勅局為刪定官談經義  
滾滾不倦發明極多尤邃於小學云汪應辰有送

刪定聞人文歸嘉禾詩云漫作中都士柴門每自  
扃遺經究終始竒字講聲形前輩今無幾微言世  
莫聽扁舟轉河曲已見故山青周必大二老堂雜  
誌中載有間人滋五說

蚤秋遊靈巖

凭欄山翠濕濛濛佛閣依然水殿風欲採蓮花何處所  
年年金井落梧桐

葉文康公時

時字秀發仁和人晚居嘉興淳熙中進士歷事四朝官終龍圖閣學士操履端方博學善屬文邃於周禮著禮經會元及竹埜詩集行世卒謚文康自號竹埜愚叟

還桑澤卿蘭亭考二首

書法光芒晉永和後來摹寫不勝多考論又得桑夫子  
蘭渚風流轉不磨

自從璽紙殉昭陵定武流傳勝得名總輯舊聞為博議

即今真贗不將憑

陸和州塏

塏字子高高郵人建炎初與兄壘徙崇德登紹熙元年進士厯祕書郎倅和州議散武定軍諸州遂安攝濠州時寇猖獗塏開示大信以收人心散卒聞塏至受廩者數千乃悉簡為勁兵改知和州養士厲俗修倉浚涇免歸卒有益齋集

送奚宰

茂宰慈祥意三年只似初折腰寧為米掣肘固難書機  
靜波浮鳥刑疎網漏魚終然清議在袞字到公車

醜梨

我邑之東有醜梨貌雖惡風味絕勝間嘗進御因

賦五言

灰貌凝清古霜津溢脆甜面嫌湯後白心慰邑中黔美  
實鍾寒谷珍嘗近御奩彼姝徒冠玉爭得似無鹽

和奚宰春風樓即事

恍然楹桷架虛空意匠經營九仞功三載笑談杯酒裏  
一時人物畫圖中金蘭託契從今始玉燭迎和與衆同  
却笑楚臺雕篆客強生分別詫雌雄

卜祖仁

祖仁未詳詩見柳志觀吾侯一語當是嘉郡人攷  
宋紹興初鹽令李直養有禱雨陳山一事而詩中  
云侯今官轉吳興去則惟熙寧間鹽令有王震而  
武康令亦有王震人龔頤正陳山廟記曰紹熙元

年郡守趙不迹作文以禱其應立至與李直養同時而不迹於紹熙三年轉吳興守或指此姑記之以質諸博雅者

陳山龍湫

考見卷八

陳山蒼蒼東海頭石壁裂缺藏靈湫老髯出水歛萬丈  
青山倒挂黃金虬神光上騰接烟靄挾子櫻珠浴滄海  
雨公載雨推雷車閭闔門叩真宰今年亢旱民罹殃  
我侯憫憫心若傷精誠披露動寥廓沛然甘澤米滂滂

卷二  
侯今官轉吳興去回首神峰隔天宇願言變化從雲龍  
大為蒼生作霖雨



鴆李詩繫卷二